

## Fundisho kuhusu Kiasi,

*Kwa sababu atakuwa mkuu mbele za Bwana; batakunywa divai wala kileo; naye atajazwa Roho Mtakatifu. Luka 1:15.*

**M**ungu alimkabidhi mwana wa Zakaria, kazi kubwa mno, kazi kubwa mno kuwahi kukabidhiwa kwa wanadamu. Ili kukamilisha kazi hii, alipaswa kuwa na Bwana ili afanye kazi pamoja naye. Roho wa Mungu angekuwa pamoja naye ikiwa atafuata maelekezo ya malaika.

Yohana alipaswa kwenda kama mjumbe wa Yehova, ili kuwaletwa watu nuru ya Mungu. Alipaswa kuwapatia mwelekeo mpya wa mawazo yao. Alipaswa awashawishi juu ya utakatifu wa matakwa ya Mungu na hitaji lao la haki kamilifu ya Mungu. Mjumbe wa jinsi hiyo lazima awe mtakatifu. Lazima awe hekalu la Roho wa Mungu kukaa ndani yake. Ili aweze kukamilisha utume wake, alipaswa awe na afya kamili kimwili, kiakili na kiroho. Kwa hiyo itampasa kutawala uchu wa chakula na tamaa. Alipaswa aweze kudhibiti uwezo wake wote ili aweze kusimama miongoni mwa watu sawa na miamba na milima nyikani bila kushawishiwa na hali ya mambo iliyokuwa inamzunguka.

Katika siku za Yohana Mbatizaji, tamaa ya mali, kupenda anasa na kujionesha, vilikuwa vimeenea sana. Anasa zinazosisimua, karamu na ulevi, vilikuwa vinasababisha magonjwa na kudhoofisha mwili, kudumaza utambuzi wa kiroho na kuhafifisha ubaya wa dhambi. Yohana alipaswa kusimama kama mwana-matengenezo. Kwa maisha yake ya kujihini, na mavazi ya kawaida tu, angekemea tabia ya ubadhirifu ya wakati wake. Hivyo maelekezo yalitolewa kwa wazazi wa Yohana, somo la kiasi lililotolewa na malaika kutoka katika kiti cha enzi.

Katika kipindi cha utoto na ujana tabia inaweza kushawishiwa kwa urahisi zaidi. Hivyo basi, uwezo wa kujitawala lazima ujengwe. Kando ya moto na katika mikusanyiko ya familia mivuto inatolewa ambayo matokeo yake yanadumu kama ya milele... Mazoea yaliyojengwa tangu utotoni, ndiyo yatakayoamua wakati wa utu uzima, kama mtu atashinda, au atashindwa...

Kama nabii, Yohana alipaswa "kuigeuza mioyo ya baba iwaelekee watoto, na kuwatilia waasi akili za wenye haki, na kumwekea Bwana tayari watu waliotengenezwa." Katika kutayarisha njia kwa ajili ya kuja kwa Kristo mara ya kwanza, Yohana alikuwa anawakilisha wale ambao watatayarisha watu kwa ajili ya kuja kwa Kristo mara ya pili. Ulimwengu umezama katika kuendekeza anasa. Makosa na hadithi za kubuni vimejaa tele. Mitego ya Shetani kwa ajili ya kuziharibu roho imezidishwa. Wote wanaotaka kuwa na utakatifu mkamilifu katika kicho cha Mungu lazima wajifunze kuwa na kiasi, na kujitawala. Uchu wa chakula pamoja na tamaa, lazima vitiishwe na uwezo utokao juu. Kujitawala huku ni muhimu kwa ajili ya uwezo wa akili na utambuzi wa kiroho ambao utatuwezesha kuelewa na kutenda kweli takatifu za neno la Mungu. Kwa sababu hii kuwa na kiasi ni muhimu sana katika kazi ya maandalizi ya ujio wa Kristo mara ya pili.

**(Tumaini la Vizazi Vyote 76, 77).**